



WWW.SOLODIPUEBLO.COM



SOLODIPUEBLO@GMAIL.COM


DIA 26 DI JUNI 2020 PARLAMENTO A AUMENTE CASTIGO ENCUANTO ABUSO DI MUCHA



NET AVP CU MAS CU MOCION DI DESCONFIANSA CONTRA MINISTER GLENBERT CROES?

**PUEBLO DI ARUBA TA CORDIALMENTE INVITA PA SINTONISA
PREMIO EXCELENCIA DEN DEPORTE 2023 DIABIerna AWO, 8
OR DI ANOCHI A TRAVES DI CANAL 22 Y TELE ARUBA**

**A.T.A.: POR MIRA
DOCUMENTARIO BLUE LIZARD
EFFECT VIA NOS PLANTA
NACIONAL TELEARUBA**



**CANDELA DEN MOTOR
RECIP #7 NA PLANTA
DI W.E.B. SITUACION TA
KEDA DELICADO!**



Minister Endy Croes:

PUEBLO DI ARUBA TA CORDIALMENTE INVITA PA SINTONISA PREMIO EXCELENCIA DEN DEPORTE 2023 DIABIerna AWO, 8 OR DI ANOCHI A TRAVES DI CANAL 22 Y TELE ARUBA

Exito na e 150 nominadonan



Diabierna, 19 di april 2024 lo tuma luga e gran evento di Premio Excelencia den Deporte 2023 na Renaissance Convention

Center. Un anochi di gala, unda lo reconoce e atletanan cu mas a destaca durante aña 2023.



Un total di 24 federacion deportivo a manda nomber di nan atleta cu mas a sobresali den nan disciplina durante aña 2023. E aña aki 150 atleta den diferente categoria ta nomina. Ademas di esaki, lo reconoce 20 entrenador pa nan contribucion den e desaroyo di deporte

di Aruba. Durante e anochi di gala aki lo rindi homenahe na dies (10) baluarte deportivo cu a dedica gran parti di nan bida na desaroyo di deporte di Aruba. Fuera di esaki, 4 atleta olimpico lo ricibi un certificado y pin for di World Olympians Association pa nan

esfuerzo y pa promove e balornan olimpico. Pueblo di Aruba ta keda cordialmente invita pa sintonisa e anochi mas grandi den deporte di Aruba en bibo di 8 or pm pa 12 or am, a traves di Canal 22, Tele Aruba y pagina di Facebook di Gabinete Wever-Croes.

2 AMBULANS A BAY CU URGENCIA NA TANKI LEENDERT PA UN DAMA CU NO TABATA REACCIONA

Diamars mainta a drenta informe di cu tin un dama cu no ta reacciona na Tanki Leendert, mesora a dirigi 2 ambulans encaso cu mester CPR. NA yegada di e ambulans nan a atende e dama cu supuestamente no ta reaccion pero a bin descubri cu ela hyperventila. Asina mes nan a transporta e dama pa hospital.



Partido MEP

MARISOL TROMP CU HOPI ODIO CONTRA GLENBERT CROES

Su mocion di desconfiansa contra Glenbert Croes a fracasa



Parlamento diamars ultimo a trata un reunion publico yama pa partidonan MAS y AVP cu minister Glenbert Croes. Nan kier a haya mas informacion tocante e maneho di DIMAS.

Sinembargo Marisol Tromp y Mervin Wyatt-Ras mas bien a probecha di e momento pa ataca y ofende e minister y demostra sentimentonan anti-stranhero, cual sigur ta di lamenta.

E minister a duna tur informacion tocante e

maneho di integracion y a duna Parlamento tur documento correspondiente.

Un punto cu a resalta ta ora cu Marisol Tromp a cuestiona Minister Glenbert Croes riba capacidad di carga (carrying capacity). Riba esey minister Glenbert Croes a contesta Marisol Tromp: “Manera bo a parti tereno manera pamflet, no a resta tereno pa ningun hende casi traha cas!” Cuestionando asina cu Marisol Tromp ta esun cu a causa e problema y

awor ta cuestiona otronan riba e problema cu e mes a cuestiona.

Mocion di desconfiansa Marisol Tromp y Mike Eman a declara cu nan no tin confiansa mas den minister Glenbert Croes.

Parlamento cu un mayoria di 12 voto sinembargo a confirma nan confiansa den Minister Glenbert Croes y Marisol Tromp tabata visiblemente rabia y frustra cu su intento pa manda Minister Glenbert Croes cas! E

rabia di Marisol Lopez Tromp ta indicacion cu e maneho di integracion di e mandatario ta dunando su fruto pa tur stakeholder.

Pues Minister Glenbert Croes t’ey pa keda pa hopi tempo ainda.



TRABOU DI MANTENCION NA SAN NICOLAS
Interupcion di Coriente

En conexion cu trabounan necesario,
coriente lo wordo interumpi:

Diamars, 23 di april 2024
8:30 AM te cu 4:00 PM

- Den vecindario di:
- Caya Mons Holterman
 - Esso Heights
 - Juwaweg
 - Kleine Bergweg
 - Lago Heights
 - Nijhoffstraat
 - St. Catherinestraat
 - St. Antoniebergweg

Diahuebs, 25 di april 2024
8:30 AM te cu 4:00 PM

- Amazonestraat
- Caya Mons Holterman
- Coloradostraat
- Dr. Schaepmanstraat
- Esso Heights
- Hildebrandstraat
- Missouristraat
- Nijhoffstraat
- Orinicostraat
- Pastoor Hendrikstraat
- Van Lennepstraat
- Vuylstekestraat
- Weg Fontein

N.V. ELMAR ta pidi disculpa pa e inconveniencia
cu e interupcion di coriente aki por causa.

Bishita www.elmar.aw pa mira e lista di adresnan afecta.

Danki pa e comprension.



Clasificados

SOLODIPUEBLO@GMAIL.COM
CEL. 585 9500

SOLO De Pueblo

Prome Minister Evelyn Wever-Croes:

Gobierno cu solucion pa planta di RWZI:

LEY DI PRIVATISACION A BAY PARLAMENTO

Pa financia esaki, lo aumenta e environmental levy

Manera ta conoci, e planta di RWZI a surpasa su capacidad ya pa basta tempo caba. Turismo a crece, pero e capacidad di e planta no a crece. Varios gobierno a purba trece solucion pero no a logra. Durante pandemia, momento cu a cera frontera y no tabatin turista, por a nota cu e planta di RWZI a haya un alivio, pero mirando e crecemento grandi di e sector turistico, e planta no por sigui carga tur esaki y a cuminsa causa mas problema. Varios intento di Gobiernonan di Aruba pa inverti den e planta, cada biaha a encontra mas reto, mirando e situacion financiero di pais Aruba.

E planta ta causa molester den e vecindario y ultimo tempo e molester a aumenta aun mas. Esaki ta e motibo pakico ta asina urgente pa yega na un solucion pa e problema serio aki.

Prioridad di Gabinete Wever-Croes 2

Gabinete Wever-Croes 2 a pone esaki como un prioridad y a institui un "stuurgroep" entre e ministerio di Naturalesa, Infraestructura y Energia, cu e tarea pa privatiza RWZI, mirando cu esey ta e unico solucion. Den esaki e compania estatal Utilities Aruba a muestra disponibilidad pa tuma over e planta y asina yuda Gobierno soluciona e problema urgente aki.

Esencia di e privatizacion Aruba Wastewater Sustainable Solutions NV

Na september 2023 Consejo di Minister a aproba e proposicion pa traspasa e operacion y "assets" di RWZI, (Bubali, Parkietenbos, Zeewijk), rioolstelsel y Incinerator pa un subsidiario cu Utilities a lanta. Indirectamente e compania lo ta 100% den man di Pais Aruba.

E compania, Aruba Wastewater Sustainable Solutions NV (AWSS), ya a traha un businessplan, un plan strategico pa termino corto y largo con pa tuma e planta over y e documentacion ta cla pa destaho publico. E plannan y documentonan a wordo traha hunto cu RoyalHaskoning y despues di traspaso mester cuminsa mira alivio mesora.

E "assets" menciona lo wordo traspasa pa AWSS pa un suma total di Afl. 31.8 miyon. AWSS lo paga esaki na Pais Aruba bek den e erfpachtscanon pa un suma anual di Afl. 582.267,51 pa 60 aña, mirando tur e riesgonan cu AWSS ta core tumando e planta aki over. Pa por haci e trabaonan AWSS lo mester inverti sumanan substancial den un planta nobo y mucho mas grandi (Capital Expenditure CAPEX y Operational Expenditure OPEX) segun e plan strategico pa termino corto y largo. Pa AWSS por haci trabao nan, e mester di entrada. Pa haci esaki posibel lo aumenta e environmental levy (Bijzondere



belasting op verblijf), un impuesto cu turistanan ta paga na e hotelnan apart di e toeristenheffing, pa cubri e gastonan (CAPEX y OPEX)

Supervision

Un parti importante di e acuerdo ta cu Pais Aruba lo cera un acuerdo cu Utilities/AWSS na unda ta palabra cu pa supervisa e normanan cu AWSS lo mester cumpli cu ne, lo implementa un "regulatory framework" y un "regulatory body". E regulatory body lo tin como miembro departamento di naturalesa y medio ambiente (DNM), departamento di salubridad publico (DVG),

departamento di obra publico (DOW) y un representante di ministerio di naturalesa.

Ley a bai Parlamento

E ley di privatizacion di RWZI mientras tanto a sali pa Parlamento. E preparacion a tuma hopi tempo, mirando cu ta algo grandi, y Gobierno di Aruba ta spera, mirando e urgencia pa pais Aruba, cu e tratamiento di e ley aki haya prioridad, Mientrastanto Gobierno di Aruba lo sigui haci su maximo esfuerzo pa trece alivio den e situacion na RWZI den e fase transitorio.



Corte di Prome Instancia 18 april 2024

Horario	Sospechoso	Acto Castigabel
14.00	C.P.A.R. S.Y.V.K.	Pro forma. R. y K. ta wordo acusa di posesion di arma di candela y balanan riba 21 di november 2023 y di a menaza tres persona cu morto. E ta wordo acusa di ladroncia di telefon di un di e tres personanan aki riba e fecha menciona.
14.00	K.K.K.E.	Pro forma. E. ta wordo acusa di a dal un persona cu auto riba 27 december 2023, cu e intencion di tuma su bida.
14.00	G.O.P.O.	Pro forma. P.O. ta wordo acusa di a viola un persona riba 28 di december 2023.

DOW

Atencion: Cambio di Ruta

📍 J.E. Irausquin Boulevard




Entrante dialuna 22 di april 2024 lo cuminsa cu e proyecto di reconstruccion di caminda na High Rise Hotels: Fase 1, cu lo ta e area dilanti Riu Palace Antillas.

E proyecto completo lo wordo haci den 4 diferente Fase y Fase 1 lo tin un duracion di 7 siman.

J.E. Irausquin Boulevard lo ta accesibel solamente pa trahador y turista yega nan destinacion.

Automobilistanan lo mester desvia riba Avenida Nelson Oduber. E desviacion lo ser indica cu borchí y baricada di trafico.



DOW y KPA ta pidi pueblo di Aruba, tur automobilista pa tene cuenta cu e desviacion aki y e inconveniencia cu lo por surgi pa cual nos ta pidi nos disculpa y ta gradici pa e comprension y cooperacion.

Parlamentario Shailiny Tromp-Lee: DIA 26 DI JUNI 2020 PARLAMENTO A AUMENTE CASTIGO DI DIFERENTE STRAF MAXIMO ENCUANTO ABUSO DI MUCHA KICO A KEDA APROBA? KICO A CAMBIA?



Dia 26 di juni 2020 Parlamento a aproba algun cambionan den nos Codigo Penal. Cambionan pa loke ta trata aumento di castigo maximo pa zedendelicten (incluyendo abuso di mucha), tambe nos a trata eliminacion di e verjaringstermijn stipula pa e delitonan aki y nos a autorisa Minister di Husticia encunto 'vroegtijdig vrijlating' di personanan encarcela na KIA.

Aumento di castigo maximo
Cu aprobacion di e cambionan a culmina un trayectoria largo cu a tuma lugar den Parlamento, caminda for di 2010 diferente comision y diferente parlamentario a traha riba e concepto di ley cu a keda trata dia 26 di juni 2020. Concretamente por bisa cu 27 artikel den e ley a conoce un aumento den e straf maximo cu por keda duna.

Delitonan manera violacion, sex indesea cu un mucha bou di 12 aña, casonan di maltrato premedita cu morto como consecuencia y maltrato severo premedita tur lo subi na 15 aña. Ta trata aumento di 3 pa 6 aña di e castigo maximo valido te na e momento ey. Aki mi ta duna algun ehempel di e aumentonan aproba:

- Violacion (art. 2:197 verkrachting) a hisa di 12 pa 15 aña;
- Relacion sexual cu un persona menor di edad (art. 2:200) a hisa di 8 pa 12 aña;
- Agresion sexual (art. 2:201 aanranding van de eerbaarheid) a hisa di 8 pa 12 aña;
- Homicidio (art. 2:259 doodslag) a hisa di 15 pa 24 aña;
- Maltrato cu lesion grave a consecuencia (art. 2:273 mishandeling die zwaar lichamelijk letstel ten gevolge heeft) a hisa di 6 pa 9 aña y si a ocasiona morto a hisa di 9 pa 12 aña;
- Maltrato severo (art. 2:275 zware mishandeling) a hisa di 9 pa 15 aña y cu morto como consecuencia a hisa di 12 pa 20 aña;
- Maltrato severo premedita (art. 2:276 zware mishandeling met voorbedachten rade) a hisa di 12 pa 18 aña y si a conduci na morto e castigo a subi di 15 pa 24 aña;

Eliminacion di e verjaringstermijn

Otro cambio cu a tuma lugar ta e verjaringstermijn di diferente delito, esta cu esaki a keda kita pa diferente delito, cual sigur ta haci posibel pa un victima semper por entrega keho, aunke hopi tempo a pasa, toch e abusado por keda investiga y husga. Cu otro palabra e victima no ta perde su derecho pa entrega keho. Esaki sigur ta un cambio cu tabata necesario

Vroegtijdig vrijlating

Vroegtijdig vrijlating tambe a conoce un cambio, esta a duna e Minister di Husticia e posibilidad pa ora cu pa motibo di e problema structural di escasez di cel den KIA e por dicidi ken mag di sali liber mas trempan. Intencion ta pa percura cu personanan cu comete zedendelicten mester sinta ful nan castigo y no mag di keda laga liber prome cu nan castigo pasa.

Parlamento no a introduci castigo maximo, pero a aumenta esakinan. Contrario na e pensamiento cu mi ta ripara ta reina den nos sociedad ya ta existi castigo y castigo maximo pa 'zedendelicten', esakinan ta forma parti di nos Codigo Penal caba pa hopi tempo. Dia 26 di juni 2020 nos a aproba cambio di un ley existente dus no ta trata introduccion di un ley of articulo nobo. Dia 26 di juni 2020

nos a aumenta esakinan cumpliendo cu e grito di sociedad pa castiga e malhechornan aki severamente.

Con a stipula e aumentonan?

E aumentonan a keda stipula uzando articulo 39 di Statuut cu tabisa cu nos leynan mester ta mas tanto posibel regla na un forma similar y a base di 'concordantiebeginsel' por bisa cu awor den Reino e castigonan maximo pa loke ta trata 'zedendelicten' ta igual.

Un caso di abuso, ta uno di mas!

Mi kier finalisa e comunicado subrayando cu cualkier tipo di abuso di mucha ta inaceptabel! Cualkier violencia domestico, maltrato y violacion ta uno di mas! Pero mi ta enfatisa cu solamente aumenta e castigo maximonan y eliminacion di e verjaringstermijn no ta suficiente. Mester bin cambio den cada aspecto cardinal den henter e sistema di proteccion di esnan mas vulnerabel, cuminsando den e nucleo familiar. Mas ainda pueblo mester ta consciente cu si di berdad nos kier stop cu tur tipo di abuso y maltrato esaki ta implica: cambio di mentalidad di nos como sociedad, y na prome lugar cu cada un di nos mester carga nos responsabilidad.

BAN PLANTA!

Biblioteca Nacional Aruba ta presenta un otro edicion di su Sustainable Education Symposium. Un evento cu tin como meta pa duna hopi informacion tocante diferente aspecto di sostenibilidad na un publico grandi, incluso alumnonan di scol. E biahe aki e simposio ta dura

un siman, for di dia 22 di april pa dia 26 di april tin diferente evento, tanto na biblioteca como na Cas di Cultura. Durante e siman aki, parti mainta, biblioteca ta invita alumnonan di scol pa presentacionnan tocante e tema Plantamento. Diferente orador ta duna

informacion tocante e tema entre otro Rendell de Kort, Ludwig Rasmijn, Diego de Cuba, Roselinde Barros-Poels y Gregory Fung A Fat. Scolnan participante ta: La Salle College, Abraham de Veerschool, EduCampus, Mon Plaisir College, Ceque college y Maria college. Dia 25 di april lo tin un



'Evening of lectures' na Cas di Cultura di 7or pa 9or di anochi. Entrada ta gratis. Oradornan ta Rendell de Kort, Roselinde

Barros-Poels y Gregory Fung A Fat. Porta ta habri 6or di atardi cu un mercado di informacion y productonan local.

Tempo cu Marisol y Benny a parti y bende tereno pa hotel y condominium manera pamflet, nan no a corda ni riba “carrying capacity”

NET AVP CU MAS CU MOCION DI DESCONFIANSA CONTRA MINISTER GLENBERT CROES?



Durante reunion publico diamars ultimo, pa sorpresa di tur hende, mane cu e reunion a habri MAS y AVP a entrega un mocion di desconfianza contra Glenbert Croes.

E mocion obviamente a keda rechasa y e strategia di AVP cu MAS pa core cu Minister Glenbert Croes a fracasa.

Carrying Capacity:

Corectamente e mandatario a cuestiona e hecho cu ta net AVP cu ta e universidad di corrupcion, net Marisol Tromp cu AVP a cataloga como Mrs Real Estate, ta esunnan cu awe kier cuestiona Glenbert Croes riba e tema di carrying capacity? Tempo cu Marisol y Benny a parti y bende tereno pa hotel y condominium manera pamflet, e tempo aya nan no a corda mucho menos worry cu carrying capacity di Aruba. Awo ta Gabinete Wever Croes

ta hay'e ta deal cu otro problema mas ocasiona pa AVP y MAS, esunnan cu a regala permiso pa hotel, bende tereno pa hotel sin preocupa kico lo pasa cu Aruba den futuro. Y e futuro ey a bati na nos porta awe y un biaha mas ta MEP mester deal cu e desasternan cu Marisol Tromp y AVP a ocasiona.

DIMAS:

Pero Minister Glenbert Croes ta considera e mocion di desconfianza di AVP y Marisol, cu por cierto a fracasa, e prueba contundente cu e maneho laboral y di integracion di e mandatario ta dunando su frutonan y ta bayendo bon. P'esey AVP cu MAS kier a baha e mandatario, no pasobra nan no tin confiansa den dje manera cu nan kier a pretende pero pasobra cu danki na Minister Glenbert Croes su mmaneho humano y husto, e ta kitando tur e votadornan di AVP y MAS.

DIMAS su servicio a conoce un mehoracion grandi.

Ta berdad cu na principio

tabatin resistencia y ta comprendibel pasobra DIMAS tabata custumbra cu 8 aña di corrupcion di permiso di AVP. Mientras tanto DIMAS sa cu

Minister Glenbert Croes su unico intencion ta pa duna un servicio optimal di integracion na comunidad di Aruba.

DENTAL SOLUTIONS ARUBA **DENTALSOLUTIONSARUBA**

NOS KIER INFORMA
NOS COMUNIDAD CU NOS TA E DENTISTA
NA WARDADIA
20 - 21
Di April

NOS TA SITUA NA
Piedra Plat 98

FREE CONSULTATION
+297 585 3255
+297 592 9398

Parlamentario Ricky Hoek (MEP):

GABINETE WEVER CROES I & II A TUMA TUR PASO NECESARIO PA ATENDE CU CASONAN DI ABUSO DI MUCHA (PARTI 2)

Aruba 17 april 2024: Bo tabata sa cu na fin di maart ultimo, Gobierno di Aruba (Gabinete Wever-Croes II) a decreta luna di april 2024 y tur otro luna di april benidero como ‘Luna Nacional Contra Abuso di Mucha’?

Cu e decreto aki Gobierno di Aruba ta tuma un paso mas y kier pidi tur ciudadano pa pensa un rato riba e problema serio di tanto abuso di mucha como abuso sexual di mucha. E abuso ta causa un dolor profundo na e mucha y su famianan y lo tin un impacto den henter e vida di e mucha.

E articulo aki ta forma parti di un serie di articulonan di loke Gobierno di Aruba a haci pa cu abuso di mucha.

Accionnan di Gobierno

For di inicio cu Gabinete Wever-Croes I&II a keda estableci, nan a bin ta traha constantemente riba e ley y procedurinan pa un castigo mas severo pa e abusadonan den caso di abuso di mucha. Gobierno ta poniendo atencion riba dos area importante cu ta prevencion y educacion. Y asina tambe gobierno ta pone atencion na e ley y procedurinan cu mester ta in place pa garantiza

na un banda e cuido y proteccion di e mucha y na otro banda e castigo necesario pa e malhechor.

Ley y procedurinan

Manera menciona ariba, Gabinete I&II a tuma pasonan concreto contra di abuso di mucha. Entre otro, a:

1. Institui un Comision Nacional di Abuso di Menor.
2. Na aña 2019 a haci Bureau Sostenermi e Advies en Meldpunt Kindermishandeling (AMK) oficial pa tur loke ta caso of sospecho di abuso di mucha. (<http://bureaustostenemi.org/nl/home>).
3. Introduci na 2019 un Kind en Jeugd FACT-team na Sociaal Psychiatrische Dienst (SPD). SPD ta forma parti (fusie) awo di Stichting Hunto.
4. Institui comision “Seksueel misbruik minderjarigen” caminda sra. Lisette Gomez – cu ta bringa contra abuso di mucha – ta coordina e trabounan entre diferente ministerionan, y yuda na unda ta necesario.
5. Inaugura Centro pa Hoben y Famia na 2020. Centro pa Hoben y Famia ta un centro multidisciplinario na unda diferente organisacion preventivo



ta traha hunto pa brinda informacion, p.e. yuda mayornan fortalece nan ‘parenting skills’. (Facebook: Centro pa Hoben y Famia).

6. Institui e Departamento di Mucha y Hoben (DMH) na october di 2022. E departamento ta percura pa e ehecucion efectivo y eficaz di e Tratado Internacional di Derecho di Mucha y e Ordenansa Nacional di Centro di Cuido di Mucha. (www.dmh.aw)
7. Certifica tur recherche di Jeugd en Zeden Politie (JZP) desde 2022 pa interroga (verhoor) muchanan y asina conduci un miho investigacion den caso di abuso di mucha.

8. Ley di kinderopvang a bay

na vigor na october 2023. DMH tin e centronan di cuido registra y ta pone cu e nivel di e centronan di cuido ta subi y mehora pa motibo cu mester cumpli cu e rekisitonan di e ley di kinderopvang.

Adicionalmente, Gobierno a subsidia gran parti di e suma pa asina leidsternan y coordinadoranan di centronan di cuido tin un estudio MBO 3 SPW KINDEROPVANG y pa despues tin minimo MBO4. Asina ta garantiza e calidad di cuido di nos muchanan.

9. Expande e cantidad di cambarnan di refugio na momento di crisis na Fundacion Contra Violencia Relacional.

10. Stichting Reclassering en Jeugdbescherming Aruba a establece su departamento di Jeugd reclassering. Prevencion

Asina nos por mira tur e pasonan concreto cu Gabinete Wever-Croes I&II a tuma pa traha contra di abuso di mucha den e ultimo 7 añanan.

Por ultimo, prevencion ta den bo man y akinan e rol di Gobierno y e profesionalnan ta minimo, Parlamentario Hoek a indica.

MINISTER GEOFFREY WEVER TA ANUNCIA CU E RAAD VAN COMMISSARISSEN DI POST ARUBA N.V. TA COMPLETO

Na januari 2024 Minister di Asuntonan Economico, Comunicacion y Desaroyo Sostenibel, mr. Geoffrey Wever, a introduci e constelacion nobo di e Raad van Commissarissen (RvC) di Post Aruba N.V. consistiendo e momento ey di cuater (4) commissarissen.

E Raad van Commissarissen di Post Aruba ta consisti di un maximo di cinco commissarissen y awo e Raad van Commissarissen di Post Aruba N.V. ta completo: desde 1 mei 2024 señor Randall Croes

tambe ta forma parti di e Raad van Commissarissen di Post Aruba N.V. Señor Randall Croes ta director di un compania di seguro y tin background den economia y experiencia amplio den sector priva, miembrecia den diferente directiva y a traha den pasado tambe como Hoofd Begrotingscoordinator di Pais Aruba.

E constelacion di e Raad van Commissarissen di Post Aruba N.V. ta consisti di e siguiente profesionalnan: señor Antonio Carlo (President-Commissaris),

señor Jacques van der Scheer (Plaatsvervangend voorzitter), señor Edwin Tromp (Commissaris), señor Henk Timmermans (Commissaris) y awor tambe señor Randall Croes (Commissaris).

“Mi ta contento cu e Raad van Commissarissen di Post Aruba N.V. ta completo awor y cu e profesionalnan den area di economia, ley, business, management, banking, finance y accounting lo aporta positivamente na Post Aruba N.V.”, minister Geoffrey Wever a expresa.

A.T.A.: POR MIRA DOCUMENTARIO BLUE LIZARD EFFECT VIA NOS PLANTA NACIONAL TELEARUBA

Entrante 18 di april 2024, pa 9or di anochi via TeleAruba, Aruba completo lo por cuminsa presencia e serie documental

'Blue Lizard Effect'. Un serie documental revolucionario cu ta profundisa su mes den e mundo fascinante di Aruba, pero di un angulo diferente. E serie ta explora e concepto energetico di felicidad y e conexion profundo cu e cultura, e hende, y naturalesa di e isla.

Un documentario cu ta carga e nomber di 'Blue Lizard Effect' mihor conoci como e Cododo Blauw, cu ta un lagadishi tipico di Aruba cu ta resalta caracteristica nan importante; renobacion y generacion, adaptabilidad y flexibilidad, sabiduria y observacion, intuicion y aventura.

E serie ta conta cu cuater episodio captivante segun e cuater elementonan natural. E elementonan aki ta

wordo traduci na un manera captivante cu ta pone nos analisa, pensa, y ta invita nos pa refleha riba nos

mesun relacion cu naturalesa y como ser humano.

Retonan manera cualquier pais semper lo existi, pero e bondadnan cu Aruba ta ofrece na nos y na hopi cu ta scoge pa bishita ta hopi! Cu e episodionan aki inspira miyones di persona internacional y cu e sirbi di inspiracion pa nos mesun

nacion; sigui duna bo maximo tur dia, pa hunto nos hiba nos pais den e rumbo

desea.

Episodio 1: Awa – 18 di april 2024: Bula den e presente mientras Jason Silva ta explora e importancia di biba riba un isla Caribeña manera Aruba. Descubri e influencia profundo di e laman segun cultura y identidad Arubiano den wowo di tres persona local cu ta inspira y conecta cu e forsa elemental aki.

Episodio 2: Tera – 25 di april 2024: Den e episodio di Tera, Jason Silva ta uni su mes na buskeda pa redefini felicidad mientras cu e ta explora e origen historico y mistico di Aruba. Segun exploracion di pasado di e isla, Silva ta cuminsa un biahe di auto-desubrimento y iluminacion.

Episodio 3: Biento – 2 di mei 2024: Sinti e forsa elemental di e biento mientras Jason Silva ta encontra cu e importancia di aire den formacion di e identidad di Aruba y su concepto unico di felicidad. Explora con e paisahe di e isla ta wordo forma segun forsan di naturalesa, lagando un marca permanente riba su hende.

Episodio 4: Candela – 9 di mei 2024: Encontra cu e poder transformador di candela mientras cu Jason Silva ta revela e esencia di e "Blue Lizard Effect" y su impacto profundo riba evolucion di

Aruba.

Experiencia e origen di e isla y e spirito di renovacion constante y transformativo.

Ta recorda cu fuera di esaki por mira e episodionan tambe entrante 17 di april na MAX, y tur diaranson durante 4 siman consecutivo riba e siguiente canalnan:

- Warner Channel: 8pm, ripiticion diahuebs 11:30am.

- TNT: 6pm, ripiticion dialuna 11am.

Discovery: 4:30pm, ripiticion diabierna 8:30am.


Un danki special ta bai na protagonista Jason Silva, un personahe renombra den e mundo di television, conoci pa su storytelling, orador di diferente conferencia importante, y creador di película, nomina pa

Emmy cu ta na un momento puntual di su bida y ta en busca di un transformacion y den mihor comprende e esencia di un bida feliz.

Un danki na e comunidad local cu a habri nan curazon y porta den nan conocimiento y di bida. Danki na

Deaxo Croes, Rolly Bislik, Kyra Hoeverts, Nichole Danser, Harold Kelly, Trudy Lampe, Watra, Armando Goedgedrag, Ethan Westera, Natusha Croes, Nathaly de Mey, Ciro Abath.

Danki na e team di A.T.A. cu a yuda durante di realisacion di e proyecto.



Tocante Aruba Tourism Authority (A.T.A.)

Desde 1 di januari 2011, Aruba Tourism Authority ta opera como un entidad 'Sui Generis'. Un organizacion independiente den e esfera publico. Aruba Tourism Authority ta fungi como 'Destination Marketing and

Management Organization (DMMO)' y ta responsabel pa uni interes turistico entre socionan local e internacional. A.T.A. ta pone hopi enfasis riba e modelo di "High Value-Low Impact" cu ta para pa

un balanse entre aumenta e balor economico di e bishitante, posiciona Aruba como un pais desea y sostenibel, y posiciona Aruba como lider di desaroyo como un destinacion. Cu meta pa sigui mantene esfuerzonan den linea segun e balanse menciona, y logra aumenta entrada pa medio di calidad di turismo en bes di e volumen cu nos destinacion ta ricibi. Capacidad di carga ta sigui ricibi atencion di parti di A.T.A.


Candela den motor RECIP #7 na planta di W.E.B. situacion ta keda delicado!

Diamars atardi a surgi un candela den motor RECIP #7. No tawatin heridonan y e situacion di suministro pa awor ta bou di control,

pero si delicado. Actualmente nos team ta bezig ta handle e situacion. Asina cu tin mas informacion, nos lo duna update.




Adictonan ambulante a purba kibra pa drenta den un container na Blauwesteeg



Lo E seca tur lagrima for di nan wowo y morto lo no existi mas. Lo no tin nada di rouw, nada di yoramento, nada di dolor mas, pasobra tur cos di antes a bai. Rev 21:4

A bay sosega den brasa di Señor nos ser stima:



Candido Jacobo Angela

Mihor conoci como "Coby of Cobito"
*11-10-1940 - †13-04-2024

Drumi dushi den brasa di Señor

Acto di entierro lo wordo anncia despues.



Publica serka nos anuncio di fayecimento di bo ser keri.
Nos tin 2 pakete pa ofrece;

Pakete 1: Anuncio di fayecimento te dia cu e defunto
ser dera
Gradicimento y invitashon pa misa pa 3 dia AFI 250,00

Pakete 2: Anuncio di fayecimento te dia cu e defunto
ser dera
Gradicimento y invitashon pa misa pa 3 dia

Na Canal 22 1x prome cu Noticiero 22 Afl 400,00

Pa mas informashon por tuma contacto cu oficina na
585-9500 of na 741-4554

Dialuna madrugada a drenta informe di cu tin adictonan ambulante ta purbando di kibra posiblemente pa drenta den un container na Blauwesteeg, mesora a dirigi un patruya na e sitio. Na yegada di e patruya a bin topa cu un conocido adicto ambulante y a core cun'e for di e sitio. Polis a nota cu e container ta bon sera y nan no a logra kibra nada di e locknan.



MIGUEL MANSUR (ACCION21):

MEP, GERLIEN CROES Y RYÇOND DO NASCIMENTO TA RECHASA REGULARISACION DI ESNAN INDOCUMENTA

Diamars den reunion publico cu Minister Glenbert Croes (Labor, Energia y Integracion) fraccionnan di ACCION 21 y RAIZ a introduci un mocion pa regularisa personanan indocumenta temporalmente. Parlamentarionan Miguel Mansur, Misha Raymond y Raymond Kamperveen kier legalisa personanan cu tin mas cu tres aña na Aruba tanten nan ta bao cierto edad, por presenta un certificado di buena conducta y cu limite riba derecho di reunificacion familiar. E mocion cu rekisitonan pa haci esnan indocumenta legal ta urgi gobierno pa tuma paso inmediato of e Minister lo mester bolbe parlamento dentro di 90 dia pa duna un splicacion pakiko no por efectua e mocion.

E mocion di ACCION 21 y RAIZ ta den linea cu loke gremionan comercial; ATIA, AHATA, CUA y KVK ta pidiendo mirando e falta di trahado. NGOs manera HIAS, UNHCR y IOM tin añas ta pidi gobierno tuma paso pa e poblacion indocumenta na Aruba. International Organization for Migration recientemente a presenta resultado di nan inventario di e poblacion indocumenta Venezolano y un impact study riba nan regularisacion. Nan ta calcula cu tin 5.000 persona indocumenta di Venezuela, 4.000 di nan ta trahando y mita di esnan trahando ta gana menos cu salario minimo. Nan ta ofrese gobierno di Aruba fondonan y asisten-

cia tecnico pa regularisa esnan indocumenta y a provee un impact study pa muestra e beneficijan di legalisa.

HIAS y UNHCR tin hopi aña ta asisti esnan indocumenta y ta boga pa nan regularisacion. UNHCR ta avisa cu gobierno tin tur dato riba esnan ilegal si nan kier realmente mira e problema. Mayoria di esnan indocumenta a yega via nos airport dus facilmente gobierno por constata cuanto persona actualmente a overstay y ta forma parti di nos poblacion indocumenta. Gobierno Wever-Croes tin casi 7 aña na poder y nunca a haci un esfuerso di inventarisa e poblacion indocumenta of studia ki beneficio nan por tin pa nos economia. E mesun politica di avestruz di no kier trata problema pa miedo di perde voto tin e solucion pa e poblacion indocumenta wanta pa añas.

Fraccionnan di ACCION 21 y RAIZ a forza un voto pa constata ken ta na favor di regularisa esnan indocumenta y ken ta contra. Den palabranan di sra. Raymond, "mi ta kere a yega tempo pa nos stop di entretene mas informacion y bay na actonan mas concreto." Partido MEP hunto cu independentenan Gerlien Croes y Ryçond do Nascimento (hunto representando 11 voto) a rechasa e mocion pa regularisa esnan indocumenta. Pa purba no aparenta anti-stranhero, MEP y e miembronan in-

dependiente a indica cu nan loke kier mira mas estudio pa tuma un decision asina. Esaki mientras MEP tin casi 7 aña den gobierno y te cu awor a evita di tur manera pa trata cu seriedad e poblacion indocumenta. Cu parlamentarionan Gerlien Croes y Ryçond do Nascimento a sostene partido MEP den un maneho anti-stranhero ta sorprendente pa hopi cu a spera mas di e politiconan hoben.

Partido AVP a sostene e mocion pa regularisa esnan indocumenta y partido MAS a abstene. Parlamentario Mansur a enfatisa cu pueblo ta mira na Parlamento pa provee solucionnan real pa e problemanan cu nos pais ta enfrenta. E tamaño grandi di nos poblacion indocumenta ta restringi aumento di salario, especialmente pa esnan di menos recurso. Sigur ta den interes general pa yega na un solucion realistico.

Diamars atardi a keda estableci ken nan ta NA FAVOR di regularisa esnan indocumenta: ACCION 21, RAIZ y AVP.

Tambe por a constata ken nan ta CONTRA di regularisa esnan indocumenta: MEP, Gerlien Croes y Ryçond do Nascimento.

Esnan contra no a provee ningun solucion pa e problematica di esnan indocumenta fuera di sigui cu e politica di avestruz di purba no trata topiconan cu por ta controversial.

Clasificados



SOLODIPUEBLO@GMAIL.COM
CEL. 585 9500

MARAVILLAS DE LA FE

Salud Suerte - Amor

Aruba: 748-5671
Cartas di tarot

Bo ta sufrí di un malestar cu bo no por cura?
Bo ta víctima di bruheria?
Bo plaka no ya jega?
Bo compra numbernan y bo no ta gana?
Bo ta bai casino y no puede tur bo plaka?
Bo tin problemanan di amor?
Bo pareja ta gañabo?
Fracaso, Soledad, Malesanan angustia, Mala suerte
Comunica na 748 5671

HOOI FRESCO

A YEGA PA ALF 39,- SO!!!

TEL: 5941317

ADDRESS: THE GOLD MINE

RANCH (MATIVIDIRI 60)

Conservacion Colaborativo den Caribe Hulandes

Saba, Caribe Hulandes – Dia 16 di april Dutch Caribbean Nature Alliance (DCNA) a organisa un seminario na Saba tocante e papel fundamental di colaboracion den restauracion di ecosistema pa Caribe Hulandes. Cu e meta di promove colaboracion pa salvaguardia naturalesa, e seminario aki a reuni varios persona clave di henter Caribe Hulandes pa comparti ehempel interesante y futuro metanan. Nacionnan Uni a declara e decada aki “Decada di Restauracion di Ecosistema”, destacando e impor-

tancia di restauracion di ecosistema y promoviendo actividadnan relaciona cu esaki. Como e organizacion lider di red den region Caribe Hulandes pa loke ta trata conservacion di naturalesa. E necesidad di trahamento hunto ta conta tambe pa restauracion di ecosistema, por ehempel, riba e rifnan di coral y mangrove. E seminario di mita dia, titula "Exito di Proyecto di Conservacion ta depende di Colaboracion Efectivo", a trece hunto miembro di cada un di e Organizacionnan di Maneho di Parke na e seis

islanan, experto local, investigadonan, gobierno, e comunidad local y ONGnan di Caribe Hulandes. E seminario tabata inclui presentacionnan tocante varios proyecto colaborativo, incluyendo e Coral Reef Early Warning System (CREWS), Proyecto ‘RESEMBID’ Reforestation, Proyecto DIADEMA RAAK II’, Proyecto COastal Resilience Needs Assessment (CORENA), Proyectonan di ‘Sea and Learn’ y Coastal Feasibility Study di DCNA y WWF (Wereld Natuur Fonds-Nederland). E oradornan a enfatisa e nece-

sidad di colaboracion entre e organisacionnan centra riba naturalesa y esunnan no centra riba naturalesa, y entre nan, socionan local, regional y internacional pa maximalisa esfuerso pa restauracion di naturalesa. Arno Verhoeven, director di DCNA, a remarca: "Den un mundo caminda e fronteran ecologico no conoce frontera, e lucha pa conserva biodiversidad local no por wordo asumi pa individuonan of pa un isla so. E ta un esfuerso colectivo cu ta rekeri colaboracion di diverso participante intere-

sa, incluyendo e comunidadnan local, gobierno y organisacionnan internacional. E meta di e seminario no ta solamente pa discuti, sino tambe pa stimula accion, reforsando nos compromiso cu e causa aki". DCNA ta gradici tur esnan cu a contribui na e exito di e seminario. Bo dedicacion y experiencia ta di balor inestimabel pa progreso di e esfuersonan di conservacion. DCNA ta spera cu entusiasmo continuacion di e cooperacion den nos buskeda comparti di un futuro sostenibel.



Horoscopo pa dia 18 di april 2024

Feliz y productivo diahuebs. Awe Solo di Pueblo ta presenta bo horoscopo pa dia 18 di april 2024.

Aries
Amistad nobo y dibertido lo saca bo di e monotonia. Spaar algo di loke bo ta gana, bida ta dal hopi buelta. Suerte ta hari cu bo den negoshi. No abusa di bo bon estado fisico y percura descansa. Number di suerte: 36, 35, 8.

Tauro
Sorprende bo pareha cu algo original. Vigila e presupuesto cu bo tin destina pa cas. Desconcierto encunto bo trabao

actual. Bo potencial fisico y mental ta avansando bon. Number di suerte: 32, 73, 9.

Geminis
Dia special pa sorprende bo pareha. Awe bo por paga e debe cu bo tin pendiente. Tension lo protagonisa e dia di trabao. Cana tur dia lo mehora bo circulacion di sanger. Number di suerte: 38, 74, 2.

Cancer
E afecto di bo amigonan lo recomforta bo enormemente. No gasta bo placa den salida publico cu por evita. Bo trabao lo influencia den bon marcha di e empresa. Bo mester actividad deportivo pa bo recupera fisicamente.

Number di suerte: 39, 24, 8.

Leo
Bo tin un actitud positivo y di dialogo dilanti bo pareha. Percura pa mantene un mentalidad di spaar. Dia faborabel pa firma un contract laboral. No reprimi bo lagrimanan, lo cumbini bo desahoga. Number di suerte: 39, 76, 3.

Virgo
Bon dia pa cuminsa cu un amistad nobo. E caprichonan excesivo ey tin consecuencia pa bo saco. Na trabao, e enemigonan a disparce ya for di escenario. Dia ideal pa stop di huma. Number di suerte: 15, 41, 7.

Libra
Apertura y comunicacion interesante cu bo famianan. Gasto importante ta na caminda. Colaboracion di bo companeronan lo ta hopi util. Monotonia por provoca bo estado di ansiedad. Number di suerte: 37, 79, 1.

Scorpio
Si bo no tin, lo bo haya bo "media naranja". Rechasa e proposicion di inversion of bo economia lo sufri. Na trabao, no ta cumbini bo lepia. Bando na e actitud ey di indiferencia pa bo salud. Number di suerte: 77, 39, 1.

Sagitario
Si bo sigui cu bo caprichonan, bo pareha lo sufri di un descepcion. Evita pa bo asuntonan personal afecta bo finansa. Awe lo bo biaha pa motibo di trabao. Vigila e exceso di alimento, e no lo beneficia bo. Number di suerte: 86, 15, 6.

Capricornio
Bo ta den un momento cu bo por namora facilmente. Sea mas cuidadoso y prudente cu placa. Oportunidad di trabao interesante lo aparece. Hiking lo mehora e estado di bo organismo. Number di suerte: 86, 66, 8.

Acuario
Ta bon pa bo entrega na otro, pero no descuida. Confronta e problemanan economico. Evita conflicto cu bo companeronan di trabao. Pabien, bo constancia lo libra bo di e kilonan ey di mas. Number di suerte: 62, 34, 2.

Piscis
Aclaria e diferencianan cu bo pareha. Bo mester ta mas prudente si bo no kier pa bo falta di placa. Bo ta hopi bon considera den bo empresa. Si bo ta pendiente di algun operacion, sea positivo. Number di suerte: 69, 26, 8.

FUNDACION SINAMI PASO PA PASO TA CELEBRA 15 ANA DI EXISTENCIA



Dia 7 di Mei 1999, Lic. Maria Cristina Harsveld, Logopedista a stablece oficialmente Clinica Integral di Logopedia Aruba, Durante añanan a mira e necesidad pa ofrece mas servicio den forma integral pa beneficia persona cu algun discapacidad y nan famia, como respuesta na e necesidad pa ofrece mas servicio den forma integral, dia 6 di April 2009 a wordo estableci oficialmente Fundación Siñami Paso pa Paso Aruba, cu e meta pa duna orientacion y guia integral di diferente disciplina pa beneficia mucha, hoben y adulto cu algun discapacidad y nan famia. Durante e periodo di 2009 pa 2024 Fundación Siñami Paso pa Paso Aruba a ofrece servicio di Psicología,

logopedia, terapia educativo, tayer di arte y psicoeducacion pa mayornan. Tambe a ehecuta exitosamente algun proyectonan cu a beneficia e grupo di meta y nos comunidad, algun di e proyecto ta: guia profesional, eco-pasco, guia pa mayornan 1 Ki ora mester bay un psicologo, 2 Un boca sano pa henter bo bida, 3 Kico ta motrica?, 4, Habla y lenguahe di 0 pa 12 luna, 5 Habla y lenguahe di 1 pa 2 año, proyecto intergeneracional, tienda mobibel, estimulacion trempran, proyecto pa muchanan cu discapacidad intelectual leve, proyecto pa hoben cu discapacidad intelectual leve, proyecto buki di balor un tesoro pa mi bida, pro-

gramanan di boluntariado, ferianan di salud y informacion entre otro. Tambe a logra cera algun acuerdo y convenio di cooperacion cu algun instancia local y internacional, esaki pa por ofrece un servicio di calidad halto y ta na haltura di e avancen cu lo beneficia nos grupo di meta y nan famia. De actualidad Fundación Siñami Paso pa Paso ta sinti orguyoso di e sosten y confianza cu ta wordo ricibi door di nos comunidad y door di algun instancia / organizacion local y internacional, tambe di por conta cu un directiva y team boluntario cu ta consisti di profecionalnan den e area di; medicina, psicologia,

logopedia, neurociencia organisacional y educacion. Sra. Maria Cristina Harsveld, Sra. Eva Rusz, Sra.

Tiara Calvo, Sra. Yazxuly Toyo, Sra. Angelica Ayala, Sra. Rubiela Gracia y Sr. Carlos Falla.

Tambe ta un placer pa nos por traha conhuntamente cu algun instancia / scol cu ta pidi nos servicio profesional pa nan cliente / alumno cu tin un retraso den nan desaroyo of un discapacidad intelectual leve y lo mester di un tratamiento corto "terapia" of un guia; coaching, mentoring, training, counseling pa un periodo mas largo.

Den futuro cu e sosten di nos comunidad y stakeholders nos lo sigui duna nos servicio profesional specialmente na e grupo vulnerable di mucha, hoben y adulto cu tin un retraso den nan desaroyo of tin un discapacidad intelectual leve y ta forma parti di e grupo "lage sociaal economische status Lage SES"

Tambe nos a cuminsa traha riba algun acuerdo / proyecto pa amplia nos servicio den forma estructural y gradual, esaki teniendo na cuenta e gran demanda cu nos ta ricibi for di e comunidad pa ricibi ayudo integral.

"ATENCION INTEGRAL PA UN MIHO FUTURO" Den coneccion cu nos 15 aniversario, den e luna di Augustus / September 2024 nos lo bay introduci e buki



di balornan "Un tesoro pa mi bida" esaki lo bay wordo parti na algun scolnan y centro di bario, nos kier a duna un danki na e comerciantenan y organizacionan cu ta colabora cu e buki.

Pa finalisa nos kier a duna un danki special na e comunidad di Aruba, nos clientenan, team profesional boluntario, American University School Of Medicine Aruba (AUSOMA), CEDE Aruba, SABA y Samenwerkende Fondsen Cariben pa e sosten ricibi

Clasificados

SOLODIPUEBLO@GMAIL.COM
CEL.585 9500

SOLO De Pueblo



A DESCUBRI UN CEPA MUTANTE NOBO Y "POTENCIALMENTE PANDEMICO" DI MONKEYPOX


Un ekipo internacional di epidemiologo a haya un cepa mutante di e virus di monkeypox (MPXV) na Kamituga, un ciudad minero densamente pobla y poder di e Republica Democratico di Congo (RDC). E virus, descendi-

ente di e cepa di MPXV di clado 1, cu ta mata te cu 10% di e infectadonan, tin "potencial pandemico", segun e autornan a declara den un articulo den preimpresion deposita diadomingo na Medixiv.

"Sin intervencion, e brote aki localisa na Kamituga tin e potencial di extende na nivel nacional y internacional," e autornan a señala. Aparentemente e variante nobo di e virus di monkeypox, denomina clado 1b, ta asina mortal manera su predecesor, pero a evoluciona pa bira ainda mas infeccioso y evadi miho e pruebanan di deteccion.

Situacion di monkeypox na Congo
E investigadonan a splica cu MPXV di clado I, cu ta prevalece na Africa Central, ta caracteriza pa un malesa grave y un mortalidad eleva, mientras cu clado II ta limita na West-Africa y ta asocia cu un malesa mas leve.

E Centro Europeo pa Prevencion y Control di Malesa a comunica recientemente cu, durante e ultimo aña, RDC tabata luchando pa contene e clado 1 di e virus. E organismo a puntualisa cu desde 2023 te cu dia 29 di maart 2024, e pais Africano a notifica un total di 18,922 caso sospechoso di MPXV, incluyendo 1007 morto. Pa loke ta 2024, a notifica 4488 caso den e pais y a reporta




un total di 279 morto.

Brote di Kamituga
Ta kere cu e variante nobo aki a surgi recientemente, den algun momento entre juli y september 2023, prome den animal y despues a bira bay riba
















humano. Mientras cu el a propaga na Kamituga, el a adkiri mutacion nobo cu a yud'e extende. Te asina leu a confirma 108 caso y casi 30% di nan a manifesta cerca e trahadonan sexual, loke ta sugeri cu e virus a propaga di manera similar n'e variante mutante cu a causa un brote importante a 2022.

Cerca di 85% di e personanan infecta tabatin lesion genital, mientras cu 10% a wordo hospitalisa y dos a muri. E analisis genetico di e virus a revela un liñahe di e cepanan Clade I secuencia previamente na RDC.



	3					5	6	
1			6					
		5	8			9	1	
9								
								5
	8	1			2	3		
					9			2
	5	9					4	

	7			2			4	6
	6						8	9
2			8				7	1
	8	4		9	7			
7	1						5	9
			1	3			4	8
6	9	7			2			8
	5	8					6	
4	3			8			7	

 Paardenbaaistraat 10, Oranjestad, Aruba Tel.: (297) 525 - 7555 www.lottoaruba.com Resultado : Sorteo 17 April 2024 Merdia		
 Sorteo # 4241 2715 2864 5952	 Sorteo # 2485 0 x Jackpot 0 x Match 4+ 0 x Match 4 0 x Afl. 12,00	Joker Letter Proximo Jackpot 210.000,-
 X2  Sorteo # 4241 9529	 Sorteo # 6447 0 x Jackpot 0 x Match 4 0 x Afl. 8,00	Proximo Jackpot 62.000,-
 X2  Sorteo # 2297 0469	 Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00	Mega Ball Proximo Jackpot 370.000,-
 Sorteo # 4241 3371 Tauro	 Afl. 470.000,-	
 Sorteo # 1115 449	 Sorteo #	
 FP		

Dama a yama bombero pasobra un cas tabata yena cu huma y no sa unda e candela ta!

Diamars mainta a drenta informe di cu tin un dama ta bisa cu su cas ta yena cu huma y no sa di unda esaki ta bini na Picaron,

mesora a dirigi un unidad di bombero na e sitio.

Na yegada di bombero a descubri cu esaki ta sali

for di cushina y posiblemente un corto circuito.

A avisa ELMAR pa bin controla un ke otro.



Polis riba patruya a boet un chauffeur pa infraccion den trafico

Diamars mainta durante patruya polis a wak un chauffeur comete un in-

fraccion den trafico na Tanki Leendert y a para esaki na Catiri. Polis a hala

su atencion pa e infraccion haci y a dun'e un boet.



POLIS TA SIGI DETENE PERSONANAN ILEGAL UN A CORE BAY PERO UN A SER DETENI




Diamars atardi a drenta informe di cu tin hende-

nan ilegal banda di un supermercado den Edi-

sonstraat, mesora a dirigi un patruya na e sitio. Na yegada di e patruya un a core bay pero e otro a ser deteni. Polis a pidi pa e vehiculo di transporte di detenidonan.

E vehiculo di transporte a bini y nan a hibe warda di polis y despues pa Guarda Nos Costa pa controla su permanencia na Aruba y si acaso tramita su expulsion.





**OLIVE TREE'S
PRE-PAID
FUNERAL PLAN**

PAY AS YOU CAN

Piedraplat ☎ 582 0000
 Sanicolaas ☎ 584 8888 | 5820000
 Habri dialuna pa diabierna | 8:00am-4:00pm

Olive Tree Social Department ☎ (+297) 743 7411
www.olivetreefuneralhome.com

Prome Minister Evelyn Wever-Croes:

Relaciona cu Luna Nacional Contra Abuso di Mucha

PROME MINISTER TA INVITA COMUNIDAD EN GENERAL PA ASISTI NA E CHARLANAN INFORMATIVO RIBA E TEMA DI ABUSO DI MENOR

ORANJESTAD – Relaciona cu Luna Nacional Contra Abuso di Mucha, luna di conscientisacion, Fundacion Mi Voz ta bo Voz, Comision Nacional di Abuso Sexual di Mucha y Gobierno di Aruba ta presenta charlanan informativo: Conscientisacion y Prevencion di Abuso di Mucha.

Prome Minister Evelyn Wever-Croes ta invita comunidad en general pa asisti na e charlanan informativo, pa asina engrandece nan conocemento y tin e oportunidad di

haci pregunta riba e tema di abuso di menor.

E anochinan informativo aki lo cuminsa di 7or PM y termina pa 9or PM y lo tuma luga riba e siguiente fecha y localidadnan di MFA durante luna di april:

- Diahuebs 18 di april, MFA Paradera.
- Diahuebs 25 di april, MFA Santa Cruz
- Diamars 30 di april, MFA Savaneta

E oradornan cu lo brinda informacion e anochinan di charla ta profesional-

nan na Aruba cu ta trahando cu y tratando casonan di abuso di menor den nan diferente areanan di trabou. Tambe lo brinda informacionnan clave riba con pa reconoce e señalnan di abuso sexual di muchanan; e impacto riba e victima y famianan; y con cada ciudadano por hunga su parti den prevencion y intervencion.

“Ban uni den e iniciativa vital aki pa aumenta conscientisacion y combati e problema alarmante di abuso sexual di muchanan. Cada mucha merece un ambiente sigur y cuida, liber di e menasa di abuso y explotacion.

Desafortunadamente, abuso sexual di muchanan ta keda un problema persistente mundialmente, incluso den nos mesun comunidad y hogarnan na Aruba.

Ta esencial cu nos uni nos forza pa educa nos mes, proteha nos muchanan, y traha pa crea un futuro mas sigur pa nan”, Prome Minister Evelyn Wever-Croes a expresa.





APRIL
LUNA NACIONAL
DE CONSCIENTISACION
CONTRA
ABUSO DI MUCHA

Fundacion Mi Voz Ta Bo Voz, Comision Nacional di Abuso Sexual di Mucha y Gobierno di Aruba ta presenta:

Charla Conscientisacion y Prevencion di Abuso di Mucha

Speakers:
Drs. Melva Croes-Yanez | Neuropsycholoog
Dr. Audrey Khan | Klinische Psycholoog
Sra. Magali Maduro | Directora Bureau Sostenemi
Sra. Omaira Britten | Poeta

7 pm - 9 pm

MFA NOORD MFA PARADERA	11 april 2024 18 april 2024	MFA STA CRUZ MFA SAVANETA	25 april 2024 30 april 2024
---------------------------	--------------------------------	------------------------------	--------------------------------

Nos muchanan Nos responsabilidad!

Fundacion
Mi Voz Ta Bo Voz



PRONOSTICO DI TEMPO

VALIDO TE DIAHUEBS 18 DI APRIL 2024,
18:00 ORA

TEMPO:
AWE TARDI Y AWE NOCHI: PARCIALMENTE
NUBLA
Y GENERALMENTE SECO
DEN MARDUGA Y MAYAN: PARCIAMENTE
NUBLA CU UN
AWACERO PASAJERO

TEMPERATURA MAXIMO 33 GRADO CELSIUS
TEMPERATURA MINIMO 27 GRADO CELSIUS
INDICE DI CALOR (HEAT INDEX) DEN Y ROND
DI ORANAN DI MERDIA: 34 PA 39 GRADO CELSIUS
UV INDEX: 12

AVISO/ ALERTA:
TA SUGERI OCUPANTENAN DI BOTO CHIKITO PA BAI
CU CAUTELA NA PARTINAN OOST TE NOORDWEST
DI COSTA.
PRONOSTICO DI TEMPO PA PROXIMO 3 DIANAN:
PARCIALMENTE NUBLA SIN AWACERO DI IMPORTANCIA.
BIENTO LO TA MODERA TE BASTA FUERTE FOR DI
DIRECCION OOST; FUERTE TE DURO DEN RAFAGA.
TEMPERATURA (GRADO CELSIUS) MAX / MIN LO TA: 33 / 27

ORACION DI DIA



Un dia fructifero colma cu e bendicion y forza di ariba y yena cu Spirito Santo

"Pasobra esun cu Dios a manda ta papia palabra di Dios; pasobra Dios ta dun'E Spirito Santo na abundancia." Huan 3, 34

Dios a manda Hesus pa siña cada un di nos con nos mester biba. Cu nos mester kere y obedece Dios. Kere den Esun cu Dios a manda, acept'E y respet'E. Ta berdad cu nos ta biba riba e mundo aki pero nos no ta pertenece na e mundo aki. Nada di e mundo aki por duna nos e felicidad berdadero. Solo Dios por haci e hende feliz. P'esey laga nos haci nos maximo esfuerso pa agrada Dios y biba di acuerdo cu Su santo boluntad.

Ban pidi Dios pa prepara nos pa ricibi Esun cu E lo manda for di shelo pa nos mescos cu E la baha riba Hesus riba dia di Su bautismo cu ta e Spirito Santo di Dios. E ta Esun cu ta yuda nos y siña nos loke ta e berdad pa nos keda pertenece na Su reino y nos por ta e testimonio cu ta confirma cu Dios semper ta e berdad. Door di esey nos ta haya un bida nobo hunto cu Hesus cu a resucita canando riba e caminda di bida eterno. E unico caminda, berdad y bida cu ta hiba nos na salvacion.

Oracion: Tata Celestial duna nos e gracia pa acepta, kere y respeta Bo Palabra. Laga Bo Spirito Santo por baha riba nos y duna nos e uncion cu semper Bo tin warda pa nos. Amen.